



[www.BibleForChildren.org](http://www.BibleForChildren.org)

# Hidin Hopapna 1




Hidin hopapna ya limmun  
Apu Dios di ad abunyan  
ya tun luta . . .



... mu ma''id ni' ha naputu' hi  
a'at tun luta. Te namaag ya  
on adallodallom an liting ta  
nunhiglan munhihillong. Ya  
nan Espiritun Apu Dios ya  
umanin'innabat hinan  
tu'yap di liting an  
umat hinan dibdib.




Ya alyon Apu Dios di, Mawaday patal. Ya nawada. Ot punhiwwayona mohpe nan patal hinan hilong ta waday mapatal ya mahdom hinan hin'algawan. Ta hidiyey hopap di algo an mihipun hinan mun'ahdom ta ingganah nan mun'ahdom bo i diyen nabiggat.



Ya alyon bon Apu Dios di, Mawada ha pumbattanan  
nan liting ta munduwa. Ot ngadanan Apu Dios hidiyen  
numbaktu hi ad lagud. Ta hidiyey mi'adwah algo an  
nihipun hinan mun'ahdom ta ingganah nan  
mun'ahdom bo i diyen nabiggat.



Ya alyon bon Apu Dios di, Ad uwani ya pohdo' an  
ma'amung nan liting hinan nunda''ul ta mabudhan  
nan luta. Ya na'at. Ot ngadanana nan mamaga hi  
luta ya nan na'amungan di liting hi baybay. Ya  
maphod di nanigon Apu Dios i diyen a'atna.



Ya alyon bon Apu Dios di, Humango ayuh tun  
lutnat'onat'on an holo' ya mitanom an makan  
ya kayiw ya bungbunga'an an  
waday buwada ta mabalin  
an minaynayun an waday  
humangoh tun luta.



Ya hidiyey na'at. Ta hidiyey mi'atluh algo an nihipun  
hinan mun'ahdom ta ingganah nan  
mun'ahdom bo i diyen nabiggat.





Ta winadan Apu Dios nan duwan o'  
'ongal an dilag an nan algo an  
manilag hitun lutah nan mapatal  
ya nan bulan an manila hitun  
luta hinan mahdom.




Ya winadana bo nadan bittuwon.  
Ta hidiyey mi'apat hi algo an  
nihipun hinan mun'ahdom ta  
ingganah nan mun'ahdom  
bo i diyen nabiggat.




Alyon bon Apu Dios  
di, Mawadaday  
dakkodakkol ya  
nat'onat'on an  
munhituh nan  
nalitingan. Ya  
hay dakkodakkol  
bon nun'apaya'an ta  
ahitatayyapanday udum.  
Ta hidiyey nagibbuhan  
nan mi'alimah algo an  
nihipun hinan mun'ahdom  
ta ingganah nan mun'ahdom  
bo i diyen nabiggat.




Alyon bon Apu Dios di, Mawadadah tun lutay  
nat'onat'on an animal ya nadan udum an  
mungkaddapan. Ya na'at boh diye.



Ya alyona boy, Ad uwani ya hay taguy lumuwon ta'u ta  
umatda i dita'u an ingohonday a'at ta'u. Ta diday  
ukod hi an namin nadan wah nan baybay ya nadan  
nun'apaya'an ya an namin nadan animal ya nadan  
mungkaddapan. Ya tinigon Apu  
Dios dadiyen namin an limmuna  
ya anakkaya an ma"aphodda.  
Ta hidiyey nagibbuhan nan  
mi'anom hi algo an  
nihipun hinan  
mun'ahdom ta  
ingganah nan  
mun'ahdom  
bo i diyen  
ibiggatana.




Ta e inha''ad Apu Dios hidiyen lala'i hidih nan garden hi ad Eden ta wan hiyay mumpapto' hidi.



Ot alyona i hiyay,  
Mabalin an anom nadan  
bungbunga' an an  
ammuna nan oha an  
adim anon di bungana.  
Te hidiye nan mangdat  
hi abalinan an mamilih  
nan pohdon an aton an  
ta'on on adi miyunnudan  
hinan pohdo' an Dios.



Ot ipidwan Apu Dios  
an alyon i hiyay, Adi  
mabalin hi anon nan  
bungan diyen ohan  
bungbunga"an te  
anom'e ya umannung  
an mate'a i diyen olas.





Ya an naminda ya ngingadanan  
diyen lala'i ta hiyay ninaynayun  
hi ngadanda. Mu ma''id i dadiye  
ha nipto' hi pun'adwana.



Ta hay inat mon Apu Dios ya impalo'nah diyen lala'i.  
Ta on na'allo'an ot to'dangonay  
ohah nan tunggal hi taglangna ot  
ahina pun'umuton nan lamoh.  
Ot apyonah diyen tunggal i  
han babai ot iyenah  
nan lala'i.



Ta hiya nan mangahawa'e nan lala'i ya  
taynana nan a' ammodna ta e middum  
hinan ahawana ta ayda na' ohhan adol.



Te hi Apu Dios ya nunhiglay pamhodnah  
nadan tatagu ta hiya nan impa'alina nan  
binuktung an Imbabalena ta an namin  
nadan mamati i hiya ya adida  
mihiwwe i Apu Dios te  
mi'tagudan hiyah  
munnananong.



### Roma 3:23

Te an namin ta'u ya numbahul ta'u an ma''id ha ta'on hi ohah agge nangibahhoh nan pinhod Apu Dios hi atona.

### Roma 6:23

Te hay dusan di bahul ya ate an ihi''anan i Apu Dios hi inggana. Mu nan ihmo' Apu Dios ya nan itaguwan hi munnananong an gapuh nan nangabulutan ta'u i Jesu Kristu an Ap'apu ta'u.

### Hebrews 9:27

Ya nibaga tuwali an maminghan an matey tagu ta nate'e ya humalyaon mon Apu Dios.

### Epesus 2:8,9

Ta mabalin mo an mi'tagu ta'u i Apu Dios an gapuh kimmulugan ta'u mu bokon dita'uy nangat ituwe te gapuh nan homo'nan dita'u.



Ot hiya nan adi mabalin hi mumbaktu ta'u te bokon nan maphod an pangat di lummuhi pi'taguwan ta'u i Apu Dios.

Roma 10:9,10

Te hay mahapul ta'ahi mabalin an mi'tagu ta'un Apu Dios ya patiyon ta'u an hi Jesu Kristu ya minahuwan Apu Dios hidin natayana. Ya abuluton ta'un hiyay Ap'apu ta'u. Mu mahapul bon ibaga ta'uy kimmulugan ta'uh nadan ibba ta'un tatagu. Te nan tagun iyukodnay nitaguwana i Jesu Kristu ya ipa'innilaanay kimmuluganah ibbanan tagu ya hiyay ibilang Apu Dios hi maphod.

John 3:16,17

Te hi Apu Dios ya nunhiglay pamhodnah nadan tatagu ta'hiya nan impa'alina nan binuktung an Imbabalena ta'an namin nadan mamati i hiya ya adida mihiwwe i Apu Dios te mi'tagudan hiyah munnananong.



Te hi Apu Dios ya aggena hinnag nan Imbabalena ta dusaona nadan tatagu mu hinnagna ta hiyay mangiyateh bahulda ta wan mabalin an mi'tagudan hiya.

### 1 John 5:11-13

Te hay imbagan Apu Dios ya alyonay pi'taguwonah munnananong nan tagun nangabulut i Jesu Kristu hi nitaguwana. Ot nan tagun wada nan Imbabalen Apu Dios hi nitaguwana ya hiyay mi'taguh munnananong. Mu nan ma''id nan Imbabalen Apu Dios hi nitaguwana ya adi mi'tagu i Apu Dios hi munnananong. Intudo''u datuwe i da'yun mumpangulug hinan Imbabalen Apu Dios ta waday dinolyu an mi'tagu ayu i Apu Dios hi munnananong.



# Hidin Hopapna 1-2

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: Bob Davies; Tammy S.

Ifugao, Amganad Bible (ifa) © 2014, Wycliffe Bible  
Translators, Inc. All rights reserved.

<https://live.bible.is/bible/IFAWBT/GEN/1>

©2024 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

